

每週經課朗誦經文(巴克禮台語漢字)2014/09/14

共同經課 - 1

出埃及記十四章十九節~三十一節

19 上帝的使者本行佇以色列的營前者，徙來行佇in的後面；雲柱也對in的頭前徙來倚佇in的後面。20 佇埃及及營及以色列營的中間，彼旁有雲有黑暗，此旁暝時發出光，通暝二旁袂相近。21 摩西就伸手指海，耶和華通暝互東風大起，互海退去，水就分開，海就成做乾地。22 以色列人落海中行乾地，水佇in的雙旁成做牆壁。23 埃及人追趕in，法老一切的馬、車，及馬兵，攏隨in到海中。24 到天欲光的時，耶和華對雲及火的柱中俯落看埃及的軍隊，拍亂in的隊伍；25 閣互in的車輪落落，攩(oh)得行，致到埃及人講：「咱著對以色列人的面前逃走！因為耶和華為著in及埃及人交戰。」26 耶和華給摩西講：「你伸手指海，互水倒轉來淹埃及人及in的車、in的馬兵。」27 摩西就伸手指海，到天一下光，海水閣照舊。埃及人逃走，水截佇in的頭前，耶和華就將埃及人摔倒倒佇海中，28 水就反流，淹密許個車及馬兵。法老的全軍隨以色列人落海者，連一個也無留啲。29 總是以色列人佇海中行乾地；水佇in的雙旁成做in的牆壁。30 彼日，耶和華按呢救以色列人脫離埃及人的手，以色列人看見埃及人的身屍佇海邊。31 以色列人看見耶和華對埃及人所行的大事，就敬畏耶和華，閣信服耶和華及伊的奴僕摩西。

共同經課 - 2

出埃及記十五章一 b 節~十一節，二十節~二十一節

1 我欲唱歌謳啫耶和華，因為伊至高至大，將馬及騎馬者穴佇海中。2 耶和華是我的氣力，是我的詩歌，也是做我拯救的主。伊是我的上帝，我欲謳啫伊，是我的父的上帝，我欲尊伊做大。3 耶和華是戰士；伊的名是耶和華。4 法老的車、及伊的軍兵，耶和華穴伊佇海中；伊特別揀的軍長攏沈佇紅海。5 深淵蓋in；in親像石頭墜到深的所在。6 耶和華啊，你的正手展出能力，得著榮光；耶和華啊，你的正手拍碎對敵。7 你發出大威嚴，摔倒許個起來攻擊你者；你發出大受氣，燒毀in親像燒草。8 你發出鼻中的氣，水就愈滄愈高，大水倚起來親像歸堆，海中的深水堅定。9 對敵講：我欲追in，我欲趕著in；我欲分所搶的物，我欲佇in來足我的心願。我欲拔刀，我的手欲滅in。10 你一下歎風，海就蓋密in；in親像鉛沈佇大水中。11 耶和華啊，諸個上帝的中間，是誰會親像你？是誰親像你——至聖通榮光，威嚴通謳啫，行出奇事？20 亞倫的大姊，女先知米利暗，手裡抬鈴瓏鼓；眾婦女也隨伊出去，抬鈴瓏鼓跳舞。21 米利暗和所唱的講：恁著唱歌謳啫耶和華，因為伊至高至大，將馬及騎馬者穴佇海中。

共同經課 - 3

羅馬書十四章一節~十二節

1 信軟苳的人，恁著接納伊，毋是欲辯論所僥疑的。2 有人信百項物攏通食；獨獨信軟苳的，是食菜蔬。3 食者莫得看輕無食者；無食者莫得擬議食者；因為上帝已經接納伊。4 你是是誰啲擬議別人的奴僕啊？伊倚在，抑是跋倒，自然有伊的主人佇啲；若是伊欲倚在，因為主會互伊倚在。5 有人擬斷此日贏彼日；有人擬斷日日攏相同。逐人心內著認呷(khi)真。6 守日者是為著主來守；食者為著主來食，因為伊感謝上帝；無食者也為著主來無食，也感謝上帝。7 因為咱無人為著家己來活，也無人為著家己來死。8 因為咱若活，是為著主來活；死，也是為著主來死。所以，咱或是活或是死攏屬佇主。9 因為基督所以死來復活，是欲做活者死者的主。10 今你啥事擬議你的兄弟？也你啥事看輕你的兄弟？因為咱眾人攏欲倚佇上帝公座前。11 因為有記載講：主講：我既然是活者：萬腳頭窩欲跪我；萬嘴舌欲謳啫上帝。12 按呢，咱逐人欲排列家己的事佇上帝的面前。

共同經課 - 4

馬太福音十八章二十一節~三十五節

21 彼時，彼得倚來，給伊講：「主啊，我的兄弟得罪我，我赦免伊著幾擺？著七擺嗎？」22 耶穌給伊講：「我無給你講著到七擺，就是到七十個七擺。23 所以天國比並人君愛欲及伊的奴僕算數。24 起頭算的時，有導一個欠伊千萬銀的來。25 既然無通還，伊的主人命令著賣伊本身及伊的某子，連伊一切所有的來還。26 彼個奴僕就仆啲拜伊，講：『主啊，著寬容我，我欲攏總還。』27 奴僕的主人就憐憫，來放伊，閣赦免伊的債。28 「彼個奴僕出去，抵著伊一個同做奴僕的欠伊一百個銀仔，就掠伊，又伊的領頸，講：『你所欠的著還！』29 同做奴僕的仆啲求伊，講：『著寬容我，我欲還你。』30 若是伊毋肯，就去給伊關落監，來聽候伊還所欠的。31 諸個同做奴僕的看見此個代誌真憂悶，將攏總的事對主人講明。32 對按呢伊的主人召伊來，給伊講：『歹的奴僕啊！因為你對我求，我就將你所欠的攏赦免，33 你豈毋著憐憫你同做奴僕的，親像我憐憫你？』34 伊的主人受氣，將伊交代刑杖，聽候伊一盡還所欠的。35 按呢恁逐人無用心赦免恁的兄弟，就我的天父也欲按呢款待恁。」